



KERATAN SURAT KHABAR

SURAT KHABAR	:	SINAR HARIAN			
TARIKH	:	1/9/2021 (RABU)	MUKA SURAT	:	26
JABATAN	:	JPNS			



Kerajaan Selangor didakwa luluskan penyahwartaan secara diam-diam

Oleh ASYRAF MUHAMMAD

SHAH ALAM

Pertubuhan Pelindung Khazanah Alam Malaysia (Pekam) mendesak kerajaan Selangor membatalkan keputusan menyahwarta Hutan Simpan Kuala Langat Utara (HSKLU) susulan bantahan menyeluruh rakyat terhadap langkah berkenaan.

Presidennya, Puan Sri Shariffa Sabrina Syed Akil berkata, keputusan penyahwartaan itu sebelum ini telah mendapat bantahan banyak pihak antaranya melibatkan badan bukan kerajaan (NGO) alam sekitar, Jabatan Pembangunan Orang Asli (Jakoa) negeri dan persekutuan, Jabatan Perhutanan Malaysia dan masyarakat setempat.

Shariffa Sabrina berkata, jumlah bantahan secara dalam talian terhadap keputusan berkenaan juga mencecah sehingga 130,000 tandatangan daripada banyak pihak khususnya masyarakat setempat.

"Kami berpendapat bantahan ini adalah relevan dan mencerminkan keimbangan umum terhadap keputusan penyahwartaan tersebut," katanya dalam satu kenyataan pada Selasa.

Pada November tahun lalu, semua Ahli Dewan Undangan Negeri (ADUN) Selangor sebulat suara mengundi me-

Rakyat bantah HSKLU dinyahwarta

FOTO: ISHAF SHARIFFA SABRINA



Orang asli setempat meletakkan tanda pada pokok yang telah dicat merah sebagai bantahan terhadap keputusan menyahwarta HSKLU.



SHARIFFA SABRINA

ISU PENYAHWARTAAN HSKLU

nyokong satu usul yang dibentangkan bertujuan melindungi dan membatalkan penyahwartaan HSKLU.

Namun begitu, Exco Pelancongan Alam Sekitar dan Teknologi Hijau, Hal Ehwal Orang Asli Selangor, Hee Loy Sian menerusi sesi pengumuman dalam Persidangan Dewan Undangan Negeri (DUN) Selangor pada Isnin memberitahu Dewan, bahawa kerajaan negeri memutuskan tidak membenarkan penggunaan keseluruhan kawasan hutan simpan itu sebagaimana rancangan asal selepas mendapat bantahan komuniti.

Loy Sian berkata, keputusan itu dicapai dalam Majlis Mesyuarat Kerajaan Negeri (MMKN) kali ke-17/2021 pada 5 Mei lalu yang kemudiannya disahkan sekali lagi pada 19 Mei.

Ujar Loy Sian, MMKN telah meluluskan kawasan seluas kira-kira 536.70 hektar daripada keseluruhan HSKLU untuk dinyahwarta di bawah Seksyen 12, Enakmen (Penaakian) Akta Perhutanan Negeri Selangor 1985.

Dalam pada itu, Shariffa Sabrina berkata, usul yang diluluskan pada sesi sidang DUN Selangor tahun lalu adalah bertujuan memastikan pemuliharaan dan perlindungan kawasan berkenaan.

"Oleh kerana tiada bantahan daripada mana-mana ADUN ketika itu, maka boleh disimpulkan bahawa usul berkenaan mencerminkan keinginan rakyat Selangor sendiri malah mereka ingin melihat tiada lagi penyahwartaan dilakukan," katanya.

15 kumpulan aktivis kecam keputusan kerajaan Selangor

SHAH ALAM - Gabungan Pertahanan Hutan Simpan Kuala Langat Utara (PHSKLU) mengemukakan keputusan kerajaan Selangor yang mahu meneruskan penyahwartaan Hutan Simpan Kuala Langat Utara (HSKLU).

Gabungan 15 kumpulan aktivis alam sekitar menerusi satu kenyataan menyifatkan keputusan kerajaan Selangor itu sebagai satu kegagalan dalam memegang amanah rakyat khususnya di negeri ini.

Malah, keputusan itu bertentangan dengan semangat dan keputusan Usul 26 yang disahkan 11 November tahun lalu oleh Dewan Undangan Negeri (DUN) Selangor apabila perisidangan sebulat suara memilih untuk mengekalkan status semua hutan simpan di negeri ini.

"Permintaan untuk menarik cadangan ini berulang kali dikemukakan. Ramai pakar berujah supaya mempertahankan sifat unik 8,000 hutan paya gambut di HSKLU iaitu salah satu kawasan terakhir paya gambut di selatan Selangor.

"Keputusan itu bercanggah dengan perancangan pembangunannya sendiri kerana HSKLU layak berada di bawah Ranking 1 Kawasan Sensitif Alam Sekitar dalam Rancangan Fizikal Negara Ketiga yang melarang pertukaran statusnya kepada kawasan pembangunan.

"Penukuran hutan akan menghasilkan 3.2 juta tan karbon dioksida dibebaskan, memburukkan lagi krisis iklim untuk negeri Selangor, negara dan dunia," kata gabungan itu dalam kenyataan bersama pada Selasa.

Gabungan terdiri daripada Pusat Kebimbangan Orang Asli (COAC), Pusat Kesenian Lima, Pusat Alam Sekitar Global (GEC), Greenpeace Malaysia dan Persatuan Pencinta Alam Malaysia (MNS) Cawangan Selangor.

Sepuluh kumpulan lain yang turut mengemukakan tindakan kerajaan Selangor termasuklah ISI: Solidariti, Parti Sosialis Malaysia (PSM), Persatuan Aktivis Sahabat Alam (Kuasa), Persatuan Kesedaran dan Keadilan Iklim Malaysia (Klima Action Malaysia-KAMY) dan Persatuan Tindakan Alam Sekitar Kuala Langat.

Turut terlibat, Pertubuhan Alam Sekitar Sejahtera (GRASS) Malaysia, Pertubuhan Pelindung Khazanah Alam (Pekam), Sahabat Alam Malaysia (SAM), Suara Rakyat Malaysia (Suaram) serta Treat Every Environment Special Sdn Bhd (TEES).

PHSKLU turut memetik petisyen dalam talian yang kini mengumpul 130,000 tandatangan dan kempen di media sosial #hutanpergimana yang merekodkan 1,500 orang menyertai kempen protes terhadap Pengerusi Jawatankuasa Tetap Pelancongan, Alam Sekitar, Teknologi Hijau dan Hal Ehwal Orang Asli Selangor, Hee Loy Sian.

"Jabatan Perhutanan sendiri menerima lebih daripada 45,000 bantahan. Malah satu petisyen dalam talian juga telah mengumpul sekitar 130,000 tandatangan (bantahan)," kata mereka.

Pada masa sama, PHSKLU juga mengutuk keputusan untuk menyerahkan tanah hutan berkenaan kepada Gabungan Indah Sdn Bhd (berkaitan dengan Samling Strategic Corporation Sdn Bhd).

Tegas mereka, ia menunjukkan kurangnya kredibiliti dan ketelusan urus tadbir oleh kerajaan Selangor kerana menyerahkan tanah bernilai lebih RM6 bilion kepada syarikat baharu dengan modal berbayar RMI yang tiada rekod prestasi.

INFO Hutan Simpan Kuala Langat Utara

- HSKLU yang diwartakan pada 13 Mei 1927 terletak di Mukim Tanjung 12, Daerah Kuala Langat, Selangor.
- Terdapat tujuh kampung yang diwartakan dalam HSKLU iaitu Kampung Orang Asli Pulau Kempas, Bukit Cheding, Bukit Kocoi, Bukit Perah, Busut Baru, Tanjung Rabok dan Bukit Kamandol.
- Kawasan itu merupakan tanah warisan, tanah adat dan tanah rayau kepada kira-kira 4,000 penduduk orang asli suku Temuan sejak ratusan tahun lalu dan telah diwartakan sebagai tanah simpanan sejak 1927.
- HSKLU perlu dipertahankan kerana ia bukan sekadar berperanan dalam pemuliharaan flora dan fauna tetapi yang lebih penting, bertindak sebagai kawasan tadahan air.



Peta lokasi HSKLU

